



16

7  
1619 10

LE  
DENONCIA-  
TEVR DES TROVBLES  
DE LA FRANCE.

4

---

M. DCXV.


Case

F

39

326

1615 ded



## LE DENONCIATEUR DES *troubles de la France.*

**Q** Vels cliquetis d'armes est-ce qui m'a esveillé du profond sommeil duquel ie iouïssois paisiblement depuis dix-neuf années par les trauaux de ce grand Henry? A quoy toutes ces leuées d'armes Parisiennes que i'apperçois par ces ruës? Est-ce point cet autre Lysander, l'Espagnol ennemy iuré de la France, qui s'estant par ses cautelles ordinaires, emparé derechef de ceste tres-importante ville d'Amiens, vienne pour en faire chanter la victoire dans la capitale ville de nostre Royaume?

Tu me responds, Guillaume mon amy, que rien moins de tout cela, & que dans Amiens y a vn grand seruiteur de Roy.

Ie recognois bien à ta desmarche, Guillaume mon amy, que tu as l'honneur de te frotter souuentesfois contre les parois des maisons des Grands. Et pource que tu puis mieux que tout autre me declarer quel est ce grand seruiteur de Roy, ie te prieray à la pareille de ne me rien celer.

C'est vn Florentin de nation, nommé Mareschal de France, & Connestable en



esperance, qui commençant à vouloir vser du deub de sa charge future, veut desia ranger nos Princes, & leur faire la loy, dont quelques-vns, comme Monsieur le Prince de Condé, le Duc de Longueuille, le Duc de Mayenne, le Comte de S. Pol, & le Marechal de Bouillon, ne pouuans endurer de luy, se sont desbandez de la Cour, & ces leuées d'armes sont pour leur empescher l'entrée de Paris.

Tu ne me donne peu à songer, me nommant tels desbandez, que tu fais.

Et qui pis est, c'est que ie voy que tu voudrois me faire croire par tes discours que tous ces Princes & seigneurs sont peu affectionnez à nostre Roy leur bon maistre.

Quant à moy, ie te diray sincerément que ie crois que tu es mal informé de leurs volontez & de leurs intentiōs, & que quelqu'un de la caballe Conchinnis que t'a voulu donner ceste faulse impression d'eux.

Est-il croyable que ceste ame toute Royale, Monsieur le Prince de Condé, ait mis en oubly tous les soings que nostre grand Henry, terreur de nos ennemis, a eu de le faire esleuer en sa tendre ieunesse, & qu'il fust aujourd'huy chef de ceux que tu

dis estre mal affectionnez aux cheres reliques de son pudique amour ?

Tu te trompe, ay-ie peur ; par-aduenture ces Princes auront-ils donné quelque conseil trop François, lequel n'aura pas peu estre esprouué d'un chascun, comme c'est chose tres-difficile en ce temps d'aggreer à tous.

Grand Henry soigneux, curateur de ce Prince de Condé, où estes-vous qui n'entreprenez la deffence de tous ces Princes, & ne faictes voir appertement à un chacun que ce que la caballe Conchinnisque leur met dessus est totallemēt esloigné de leurs intentions, & qu'eux tous ne respirent que humbles obeïssances & seruices enuers leur ieune Roy vostre fils ?

Venez d'un pas leger : & ayant fait voir leur innocence, chassez de vostre Louure ces ames basses, qui y causent tant de desordres.

Iadis il y eut vne These agitée, & depuis resoluë par les Philosophes de la Grece, que parmy les choses du monde, les plus parfaites estoient celles là qui ont moins besoing des autres.

Aduoüerons-nous, sans rougir de honte,

qu'une ville de Paris, habondante en toutes fortes de bons & excellens ouuriers, soit moins parfaite qu'une ville de Florence, & qu'à celle-fin nous ayons besoing d'elle, pour la manufacture d'une chaire à vous reposer, ou le Roy vostre fils? & que pour nous en faciliter les moyens, nous soyons contraints & reduits iusques à là que de mendier la faueur d'une Florétine, & pour ce l'honorer de la demeure de nos Roys, pour en auoir de la façon de ses ancestres?

Non, Sire, il se trouuera maistre dans l'enclos de Paris, qui ne cedera à aucun de la maison de ceste belle Marquise: & puis si en cela nous-nous deffions tant de nos excellens ouuriers, ayons recours au remede de ce peintre, qui n'ayant sceu représenter Helcine assez belle, la couurit de pierreries & ioyaux de hault prix: faisons couvrir ceste chaire de pierreries les plus rares & plus riches qui se pourront recouurer dans le Royaume: pour le moins rien (comme il fait tous les iours) ne sortira d'iceluy, & ne tomberons en l'inconuenient des mauuais mesnagers, qui acheptent à hault prix, & à beaux deniers comptans ce que leurs propres terres leur pourroient fournir.



Or ça belle & poupine Marquise, sera-ce par vostre aduis qu'un conseil de ce Prince de Condé, ou d'une sacrée Cour de Parlement de Paris, sera suivi par cette bonne Royne Mere, Marie de Medicis, Royne du tres-hault renom? Non, vous avez l'ame trop maligne, pour ne preoccuper ses volontez, & ne luy faire trouuer pestifere ce que totalement est salutaire & à elle & à toute la France.

C'est chose bien vraie que l'arrogance est une qualité propre aux personnes qui sont nouvellement enrichies, ou bien qui sont appellées aux dignitez par cas fortuits ou par le benefice des maistres qu'elles ont seruies.

Nous en voyons un exemple en vous, Marquise à triple estage: Nostre vigilante Royne vous ayant tirée de la poussiere de vos ancestres, gens de basse main, & vous ayant admis à sa suite, sa grande liberalité la portée à vous octroyer plusieurs grands dons que ne meritez: aussi en estes-vous deuenue si superbe & arrogante, que personne ne peut compâir ne demeurer avec vous: mesmes iusques aux grandes sommes d'argent de la Bastille, lesquelles par vos

astuces vous auez arrachées des mains de ceste bonne Princeſſe, ne peuuent demeurer où vous eſtes, Monsieur le Mareſchal voſtre mary eſtant contraint de les ſortir de voſtre maiſon, & les enuoyer à Florence: ce qu'il fiſt encor quelques iours auparavant ſon départ de Paris, donnant charge de les faire ſortir du Royaume à voſtre Doctiſſime frere l'Abbé de Marmoutier: c'eſt choſe toute notoire à vn chacun.

Vrayment Monsieur le Mareſchal ne pouuoit bailler ceste charge à homme plus capable qu'à ſon beau-frere, homme auquel le ciel a fait grand tort de le rendre ſi ſçauant qu'il n'oſeroit faulte de ſcience & d'entregét paroître parmy les gens doctes.

L'on diſt que ſon eſtude, tant en la langue Françoisſe, qu'en la Latine, leſquelles toutes deux il entend fort bien (ſ'il les cōprenoit) l'a rendu admirable en toute l'Arcadie, & luy a rendu le iugement poſé & arreſté comme l'eſguille d'un cadran.

Quelle choſe le peut rendre plus recommandable que toutes ces belles qualitez tant requiſes à gens deſquelles, comme de luy, deſpendent vn grand nombre de Religieux, lumieres eſclairantes de nos ames?

Cet Abbé est homme si tres-docte, que s'il sçauoit lire à ouuerture de liure en François ou en Latin, voire mesme en Italien, qui est sa langue maternelle, i'oserois bien croire que Messieurs de S. Martin de Tours ne refuseroient (comme ils font) de le receuoir pour leur Archeuesque. Vn compas en sa main demeureroit mieux qu'une Crosse, non pas pour en faire des grandes demonstrations de Mathematiques, car le bon homme ny entend notte: mais pour compasser quelque piece de bois à faire chaire, ou autre piece de menuiserie.

En cela il s'en peut bien seruir s'il n'en a oublié l'vsage depuis le temps qu'on le fist quitter la boutique, pour prendre vne vacation de laquelle il s'est rendu indigne. Il n'estoit besoing qu'il vintse augmenter le nombre des prestres ignorans, il n'estoit desia que trop grand sans luy en la France.

Encor ne passerons-nous plus outre sans faire recit d'une partie des loüanges deuës aux merites de Monsieur le Marechal, & dirons qu'en cette saison difficile, parmy l'esblouissement des armes, & la crainte qu'on a de quelque trouble en ce Royau-



me, on a beſoing de telle ſorte de perſonnes que luy exercées & expérimentées, non ſeulement es affaires d'Eſtat, mais auſſi de la guerre.

Ne voyez-vous pas que ſon corps & ſon viſage ſont ſi chargez de glorieuſes cicatrices des bleſſures autres fois receuës pour la France, qu'il luy eſt impoſſible d'aller ny à pied, ny à cheual, mais ſeulement en carroſſe d'ordinaire allant de Paris à Amiens en moins de temps qu'il ne feroit par la poſte.

A la verité ſes bons ſeruices rendus à la Couronne de France, meritoient bien d'autres recompensés que celles qu'il a eu. Vn eſtat de Mareſchal de France eſt peu pour luy, il luy faudroit pour le moins vne Vice-Royauté: mais il faudroit l'enuoyer luy-meſme la choiſir en Eſpagne, & le prier d'y vouloir finir le reſte de ſa vie, laquelle peut-eſtre cauſera la mort d'un infinny nombre de bons François.

On ne ſent rien des mauuaiſes humeurs qui ſont eſparſes parmy le corps tandis qu'il eſt ſain: mais dès que quelque partie eſt mal, on en eſt moleſté, & toute la douleur ſ'y ramaffe, & ſ'y aſſemble.



Tandis que la Picardie est demeurée paisible & sans aucun trouble, nostre Marechal frezé n'a fait sentir combien il luy estoit vtile : Mais si tost qu'il a veu qu'un bref mal-heur se ramassoit & assembloit en icelle, incontinent il a songé aux remedes, s'y rendant vistement : & pour premices de ses remedes Italiennes a pensé mal-heureusement attirer en ses pieges ce brave & fidel Prince de Longueuille, qui comme vn ieune & genereux aiglon regarde fixement les rayons du Soleil de la France, nostre Roy, & en demeure inuiolablement enflammé à l'honneur de son seruice.

Retournons vn peu à vous belle Marquise, & voyõs quelles responses vous nous ferez.

Penseriez-vous que vos charmes ayent pouuoir d'aueugler tout vn Royaume, comme ils ont fait ceste grande Princeesse, laquelle a autresfois tant obligé la France : mais maintenant par vos pernicieux conseils se porte froidement contre ceux qui ne recherchent que sa ruine ?

Non, non, ostez cela de vostre esprit, & croyez assurement qu'ils n'auront tousiours la mesme force qu'ils ont à present.

Nostre Louys, cher gage de ce grand Henry, leur donnera vn iour l'Ostracisme. Et pour tesmoignage du grand amour qu'il porte à ses subjects, les voyant tous languissans par mille oppressions, exterminera vostre race & celle de ces Magiciens, avec lesquels est vostre ordinaire entretien.

Nous sommes Chrestiens, & vrayement Chrestiens qui ne detestons rien tant que la conuersation de ces Iuifs, lesquels vous cherissez tât, que de toutes vos forces vous taschez de leur faire auoir l'oreille de nostre Royne, luy voulant oster le Coton, remede souuerain contre les vents soufflez par gens qui pour viure avec plus de liberté & moins de croyance viroient volontiers le naufrage de la nacelle du Prince des Apostres.

Souueraine Cour de Parlement de Paris, vostre pouuoir est il maintenant tellement borné, qu'il ne vous soit permis de prendre congnoissance & de la vie & des mœurs de ces gens là, lesquelles n'attireront vn iour autre chose sur nostre Royaume que ces estrangers, fleaux de l'Empereur, souuerain de ce grand Vniuers, la faim, la peste, & la guerre?

Nous sommes auiourd'huy à la veille, montrez vostre pouuoir, & passez sur toutes difficultez, quoy que grandes ; en cela les bons François seconderont vos entreprises.

A la verité ie rougis de honte, songeant au traictement qui vous fust fait voulant n'agueres declarer vos saintes intentions, pour la conseruation de cet Estat : Mais l'affection que vous portez à vostre ieune Roy, & le repos que desirez à son peuple, vous conuient à faire encor vn autre essay, luy remonstrant que ces gens là sont des pestes tres-dangereuses en son Royaume.

Qui est-ce qui trauerse d'auantage vos saintes intentions, sinon ceste superbe, & autres de telle farine qu'elle ? Le dragon faisant la guerre à l'aigle, ne tasche qu'à espier son aire, & luy oster ses petits pour en desfaire la race : Elle voulant comme les Lièvres mourir en son gist, elle fait la guerre à toute oultrance à l'argent de la Bastille, l'enuoyant prisonnier à Florence : & pour auoir meilleur moyen de ce faire, & n'estre descouuerte en ses pernicieux desseins, elle tasche par tous moyens de destruire & aneantir enuers la Roynes l'autho-



rité de vos saincts & sacrez conſeils.

Ha! Madame, comment preſtez-vous l'oreille à ceſte arrogante qui ne ſert que d'eſponge pour effacer tout à coup les beaux traicts de pinceaux, que vos merites & vos vertus auoient dextrement tirez ſur le tableau de la memoire & de l'immortalité? C'eſt ce ſacré Senat que vous deuriez eſcouter, lequel ne respire que voſtre gloire.

Pour moy, Madame, la larme à l'œil, & l'ame toute tranſie de douleur, ie vous prie comme voſtre plus que tres-humble & plus que tres-obeiſſant ſubiet & fidele ſeruiteur, qu'il me ſoit permis de vous conſeiller d'interdire voſtre compagnie pour quelque temps à ceſte arrogante, afin que dedans ce temps-là le charme qu'un chacun croit aſſeurément qu'elle vous a baillé perdât ſa force & vigueur, vous recognoiſſiez que la preſence de ſa perſonne eſt entierement preiudiciable à voſtre bonne renommée.

Ceſte arrogante eſt en la France comme ce laurier des campagnes d'Heraclee, duquel Pline fait mention au dernier chapitre de ſon ſeiziesme Liure, lequel eſtoit de telle nature qu'une branche d'iceluy eſtant



mise dans vn nauire, tous ceux qui estoient dedans entroient tellement en dissention & discord entr'eux qu'ils ne pouuoient s'accorder que ceste branche n'en fust ostée & iettée dans la mer.

De mesme Messieurs les Princes & plusieurs bons François, Madame, seront tousiours débandez de la Court, & se retireront d'icelle, si vous n'en tirez & renuoyez en sa terre natale ceste superbe qui ne sert qu'à obscurcir vostre gloire, & diminuer la bonne affection qu'ont à vostre seruice tous les humbles subiects de vostre fils & Sire nostre Roy.

Puis qu'il n'y a gloire aucune en ce monde plus celebre & recommandée que celle qui se peut acquerir, en ayant pitié & compassion des affligés: ayez ie vous prie pitié, Madame, des pauvres François, desquels quelquesvns sont desia ruinez en certaine contrée de ce Royaume, par le soldat inhumain, & deliberez les brefs remedes contre ces débandemens; d'autant qu'aux choses dangereuses il n'y a rien de plus pernicieux que la longueur des deliberations.

S'il est ainsi que les anciens offroient au grand Hercule dompteur des monstres des

feux, luy rendoient des honneurs, luy bastissoient des Temples & des Autels: Les François vous voyant armée du feu de charité, de sagesse admirable & d'un sain iugement rompre le col à la guerre qui menace l'Estat de grandes ruines & desolations. & vous voyans luy rendre la paix, delices des gens de bien, outre les grandes obligations desquelles vous les auez assisté, vous les obligerez & particulièrement les gens lettrez, à faire paroistre leurs encres plus purifiées, leurs plumes plus diuines & leurs traicts plus subtils pour consacrer vostre gloire & vostre nom à l'éternité.

Et en ce faisant vous ferez iuger à la posterité qu'es personnes du grand Henry & de la sage Marie, la France a eu des dompteurs de ce monstre de la guerre, monstre qui n'est autre chose qu'un tison d'enfer, qui ard perpetuellement dans le cœur de ceux qui ayans dissipé le leur, affamés de l'autrui ne peuuent viure pacifiques, & pource ne demandent qu'un trouble en l'Estat pour pouuoir triompher des labeurs du pauvre peuple.

F I N.



